
Ingeniosissimo Humanissimoque Viro

D. Jo. Cotesworth,

M. D.

Carmen gratulatorium.

Autore J. Jones

Junii 22. Anno cIo. Io CLXXXV.

Artis Apollineæ celebrem, summumq; Magistrum,
 Pœoniâ meritò redimitum tempora lauro
 Musa canas, totumque viri fer facta per orbem.
 Tu prolem Thymbræ tuam, sine, numine blando
 His saltem accumulem donis; hoc munere fungar.

Phillyridæ Chironi, Amythaonioque Melampo
 Sacrarunt olim veteres monumenta Poetæ.

His pingues cecidere greges, & victima taurus
 Maxima; & immensis caluere altaria flammis.

Nos saltem tenues parvum tibi vovimus hædum
 Ara ubi thure pio, fertisque recentibus halet,
 Lætus ubi instaurem solennia vota quotannis.
 En plenis calathis florentia rura Napæ
 Atque hortos hilarant tibi: cui dedit almus Apollo
 Scire potestates Florum, Herbarumque comantum.

A

Quæ-

Quæcunque *Oxonii* sacris nascuntur in hortis,
Aut quas irriguis producit *Cantia* pratis
Cantia florilegis sedes gratissima Nymphis.

Anne tuâ memorem revocatos faucibus Orci
Arte viros. Vidi ora modis pallentia miris
(Qualia defecto languent ubi lilia collo)
Instaurata tuis iterum juvenescere succis.

Vieta tibi febris cedit, cui territa monstro
(Tam metuenda lues morbi inclementia tanta)
Roma aras posuit: sacrosque indixit honores.
Illa quidem miseros rotat artus turbine crebro;
Verberat oppositum velut ænea machina vallum.
Sed tibi quum pestem venis avertere curæ est;
Quamvis ima tremor quasset præcordia & omnes
Articulos vibret, seu quondam turbidus Auster
Ingenti incumbens vexat querceta tumultu.
Verset mille dolos, atque artes mille nocendi
Ambiguo texensque fugas & prælia ludo,
Versuti non te fallit solertia morbi.
Cuncta patent; morbique adytis tibi fomes ab imis
Panditur, interiusque premens agis atra venena.
Haud aliter Furto, cæcique ambagibus antri
Defensum frustra Cacus *Tirynthius* Heros
Claustra emolitus superas eduxit in auras.

Tu cerebrum pigro haud pateris torpere veterno
Spem liquidam indulgens, & dulcia gaudia Musæ,
Quæ nunc purgatâ se pandit lætiùs aulâ,
Liberiusque Dei geniales concipit haustus;
Non adeo *Lenæ* tuis præcordia donis
Nostra calent, tantâve animum dulcedine mulces.
Dat lenem & solidum menti tua dextra vigorem;
Lætitia hinc oritur cœlestis conscia flammæ,
Quæ nunquam nebulis fumisque obtexitur atris.
Talia vos animæ felices flumina circum
Lethæa hauritis jucunda oblivia rerum.

Quin-

Quinetiam Hydropis distenta paludibus alvus
 Quum stagnet, tumidisque abdomen ferveat undis;
 Continuo exhauris putrem multâ arte Lacunam,
 Et liquidos cogis tandem subsidere fluctus.
 Adde quod ipsa lues cui fuscis nomen ab *Indis*
 (Occiduis heu fœda Venus pestem edidit oris)
 Victa jacet, penitusque cavis fugit acta medullis.
 Usque adeo ut nequeat feralis tabe veneni
 Aut membra inficere, aut occulto viscera lapsu :)
 Carpere vel geminas inhonesto vulnere nares.
 Mula mihi *Ægeas* citius numeraveris undas,
 Quam liceat morborum omnes evolvere formas,
 Quos superas succis herbarum, usuque medendi.

Nec medicas solum impendit tibi Delius Artes,
 Carmen amare dedit, numerisque intendere nervos.
 Hinc tecum placidæ sua miscent otia Musæ,
 Nempe haud imbelles abigis tristi ore Camœnas.
 At molles aditus, & blandi gratia vultûs
 Urbanique trahunt mirâ dulcedine mores.
 Evulsit peragrata omnes tibi Gallia spinas :
 Borboniâ juvenis dum tu versaris in aulâ,
 Mollior irriguis ubi Sequana labitur undis.

Flumina item cordi, ripas ubi scena comantûm
 Prætexit salicum, & latè carecta coronant.
 Illic dum tremulâ moderaris arundine linum :
 Haud mora, pinnigeram vitreo sub gurgite turbam
 Dulcibus illecebris in aduncos pellicis hamos.
 Dumque ita miraris riguos inglorius amnes
 Linigeræ indulgens arti, quot condere longos
 Te soles memini & seræ haud decedere nocti !

Sed neque præteream Fidei & Pietatis honores ;
 Dira licet jam nunc Lemnæ bellua Lernæ
 Sæviat, occiduasque erectis anguibus oras,
 Ataque Arctos rapiens crudis circumsonet armis.
 Tu Conjuratos sceptrum convellere fratres

J A C O B I, genus invisum, Titania Monstra
 Oppugnare audes; audes contemnere larvas,
 Atque levem famam, & vanas sine viribus iras.
 Dum fido ingentes animos in pectore versas,
 Et pulchrum pro Rege mori succurris in Armis.
 I felix, cui proposito non pectus honesto
 Dimovit rabies populi aut fanaticus ardor.
 I nunc ominibus latis; ego, providus augur
 Tempestatem atram, J A C O B I numine & armis,
 Disiectam tenues video evanescere in auras
 Pacatosque iterum coelorum albescere tractus.
 Et jam tempus adest, (nisi Musam oracula fallunt)
 Quo Victor *Cæsar* populumque ducemque rebellem
 Fulmine transfixos rutilo sub tartara mittet.

F I N I S.
